

Himpunan Rakyat Bersatu dicemari sentimen perkauman sempit - Bersih 2.0
Astro Awani
September 16, 2015
Oleh Harits Asyraf Hasnan

Mengulas berkenaan Himpunan Rakyat Bersatu, Bersih 2.0 menyifatkan perhimpunan itu dicemari sentimen perkauman sempit dan melampau.

KUALA LUMPUR: Gabungan Pilihanraya Bersih dan Adil (Bersih 2.0) hari ini mengutuk tindakan pihak-pihak yang menyalahgunakan hak berhimpun untuk melancarkan serangan perkauman terhadap rakyat negara ini.

Pada masa sama, Bersih 2.0 turut menggesa supaya pihak yang memainkan sentimen perkauman sempit serta membuat ugutan keganasan diambil tindakan undang-undang oleh pihak berwajib.

Dalam kenyataan Perutusan Hari Malaysia 2015 yang dikeluarkan Jawatankuasa Pemandu Bersih 2.0 pada Rabu, mereka menegaskan bahawa semua lapisan masyarakat mempunyai hak untuk menyatakan pendapat, namun syaratnya perlulah mempunyai komitmen untuk melakukannya secara aman tanpa ancaman keganasan dan perkauman.

"Ini jelas telah digunakan dalam perhimpunan hari ini dalam usaha untuk menyemai rasa tidak percaya sesama warganegara sambil menyebarkan sentimen kononnya 'Malaysia Melayu Punya'.

"Sepanduk tersebut merupakan satu penghinaan terhadap Hari Malaysia dan semangat perpaduan rakyat Malaysia selepas hampir 60 tahun merdeka," memetik kenyataan media tersebut.

Mengulas berkenaan Himpunan Rakyat Bersatu, Bersih 2.0 menyifatkan perhimpunan itu dicemari sentimen perkauman sempit dan melampau.

"Taktik *misdirection* (hala tuju tersasar) sebegini sering digunakan untuk mengalihkan pandangan dan tumpuan ramai terhadap apa sebenarnya yang sedang berlaku.

"Sambil menampilkan gambaran yang indah-indah, perkara-perkara buruk yang sedang berlaku cuba diselindungi seolah-olah ia tidak berlaku," memetik kenyataan media tersebut.

Selain itu, Bersih 2.0 menyifatkan Hari Malaysia adalah simbol perpaduan negara yang hidup dalam keharmonian dan kemakmuran, namun perhimpunan hari ini yang dicemari keganasan adalah bertentangan dengan semangat perpaduan negara.

Bersih 2.0 yang dipengerusikan oleh Maria Chin Abdullah turut menyeru semua rakyat Malaysia untuk menolak sentimen perkauman sempit, saling berbaik sangka sesama jiran tetangga dan saling hormat menghormati kerana Malaysia adalah milik kita bersama.

© 2015 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-malaysia/himpunan-rakyat-bersatu-dicemari-sentimen-perkauman-sempit-bersih-2-0-73539>